

滇雲歷年傳

滇雲歷年傳卷八

雲南叢書史部之一

契臯老人倪蛻輯

曾孫慎樞梅岑恭校

起明世宗嘉靖元年盡萬歷十二年

天台馮甦曰雲南古不毛地也且舟車不通商賈罕至人有百金之業便爲素封貧者至不保朝暮卽其土所產或反不如他處易求而世多膠于金鏤作貢之說動以滇爲金穴寶山不肖有司因而張威勢以索之夷性輕生極於勢無可復輒起爲亂後人不知其故謂滇難治嗟乎豈滇真難治耶漢鄭純毫毛不染而哀牢化隋梁毗對餽金慟哭而諸夷感悟遂不

相攻元述律杰不爲金婦所餌而車里嘆服彼皆非
三代以上之人猶能以廉勵俗若此奈何末世上作
而下效之明三百年叛者十數起推其由來多因黷
貨予故於內外夷蠢動之後復載珍貢一篇夫亦曰
知所以亂之之由則知所以治之之道耳語云金生
麗水今麗江其地也江澣沙泥金赭雜之貧民淘而
鍛之日僅分釐售蜀賈轉諸四方永平山中亦有金
沙色赤而利更微明初歲貢金二千兩官償價銀一
萬一千四百有奇皆蜀賈有力者先期受值走四遠
哀入之然金少價高率賠其三分之一間有窮極而逃

者因舉殷實土著以當金戶寶石琥珀等珍皆吉其
供辦產盡則更舉一家萬歷十八年又增金三千兩
歲共貢五千兩公私益困始減二千天啟水鳥之亂
奉旨暫停事平再進銀鑛二十三所皆置場委官以
徵其課又銅鑛十九所鉛鑛四所萬歷二十年命內
監楊榮至滇督理鑛稅又使千戶張國臣赴京上疏
請開寶井于猛密先是寶石之取盛於成化然止在
京購買嘉靖丁亥始遣官至滇歲動布政司及永昌
府銀八千散之民間民間鬻男販婦不充所值因而
逃亡其後六慰變亂猛密寶井已爲緬據國臣又倡

此議巡撫陳用賓懼開邊禍連疏陳諫始仍舊例然猶每歲布政司獻寶石三百六十兩有奇鑛金四百兩鑛銀一萬兩而監稅楊榮竟以貪酷激變於三十四年正月八日爲衛軍所殺舉火焚公署闔府百餘人皆死焉琥珀出孟養山中價不甚昂然蠻漢阻絕商賈難通萬歷二十二年奉旨責輸二百餘觔遍派滇西諸郡雖不通緬亦行責買時惟騰衝庫內舊貯二十餘觔悉送上供他郡無以應命搜括士民有卽舉首多以破家亦竟不能完數也點蒼屏石產大理府雖不在外夷而採難運遠亦以累民嘉靖十八九

年曾奉取用二年之外始得至京洎二十五年取方
三尺五寸者六塊自本年六月至十一月行三百里
運至普朔因重不能前進四十年又行取五十塊高
六七尺不等巡撫蔣宗魯抗疏諫止然當時取辦猶
不論何項花紋至萬歷二十一年爲兩宮鋪地詔取
鳳凰石百餘求之益艱供役者十死八九惟高不過
三四尺人猶以爲蔣公之力焉右志乘所載皆止行
之自上者耳其他長吏之饋遺權要之悉索不可勝
計民窮思亂孰能禁之哉蛻曰滇雲一隅之地著於
唐虞歷於三代通於秦漢亂於唐棄於宋啟於元盛

於明然亦困於明極壞於明不可收拾於明自英宗
初立卽設鎮守雲南太監自此八九十年滇雲之人
未常一日安枕以嘉靖以前鎮守貪殘而釀禍亦困
而極壞之時矣及世宗嗣位首革鎮守氛祲悉除得
瞻天日可謂清明之世矣其如增金益鑛寶石文屏
珍貢之詔旨頻頒百姓之痼癘更甚加之稅鹽溢額
以及邊餉增添迫若源泉混混之不舍晝夜焉是嘉
靖以後之亡餘年百姓無復有生人之趣而遂至於
不可收拾矣利之一字凶於而家害於而國而人每
徇之而不顧者何哉

世宗嘉靖元年復永昌府治廢金齒指揮使司仍置永昌衛

志永昌舊爲九隆氏所居號哀牢國漢武時屬益州郡後漢永平中哀牢王內附始置永昌郡後改易名稱不一至段氏置永昌府至元十一年置永昌州十五年陞爲府隸大理路二十三年置金齒宣撫司洪武十五年仍置永昌府又置金齒衛二十三年省府改衛爲軍民指揮使司景泰中設鎮嘉靖改元罷鎮復永昌軍民府設保山縣附郭從巡撫何孟春巡按陳察之請也

改騰衝指揮使司爲騰越州仍置騰衝衛

志越賧地蒙氏時爲輓化府後白蠻居之改騰衝府
元憲宗三年內附明初爲千戶所後陞軍民指揮司
至是改設騰越州仍設騰衝衛

開大理鎮

三月復設寧州流官知州

詔巡撫雲南副都御史何孟春爲吏部侍郎

五月鄧川有一村出異蟲背有火星三十二點經月始
不見

楚雄莊甸坡禾雙穗自此歷數年皆然

賜故潁國公傅友德宣德侯金朝興汝南侯梅思祖祠於雲南

野史是名報功祠蓋三公皆平雲南有功者也

秋八月鄉試雲貴生儒取張含等五十五人

名第錄內雲南三十四人貴州二十一人舉進士者雲南張含李元陽趙汝濂賈文元唐錡五人含志淳子元陽世稱中谿先生

增設大理督捕通判駐白崖

二年春正月賜勅鎮江府同知嚴時泰爲永昌府知府控制外夷

史給事中毛玉奏永昌復設知府委與民便恐軍官
樂縱惡拘陰懷阻撓請照都勻府例降勅與知府撫
安內地控制外夷從之

夏曲靖人胡晟妻生一男兩頭四手三足

六月澱江無雲而雨大水蒙化亦然且自五道河湧出
大水不知何來衝沒田廬

秋騰衝旱

巡撫王啟建五華書院

傳啟字景昭浙江黃巖人以右副都御史撫滇建書
院治城郭適永昌復府治肇書毅然不爲浮議所搖

滇人士感之

三年春改永昌金齒二千戶所爲永平縣

志永平縣洪武中改屬金齒衛指揮管又立永平禦
二千戶所至是永平仍隸永昌府不屬於武弁矣

保山縣民曾銘家牝雞化爲雄每至夜半鳴不已

夏騰越多虎

秋七月翰林修撰楊慎以議大禮謫戍永昌衛給事中

毛玉逮杖死

蛻按以大禮議而得罪者楊廷和毛澄蔣冕毛紀林
俊喬字汪俊夏良勝何孟春等以大臣止於削奪其

謫戍者學士豐熙等八人決杖病瘡死者編修王思等一十七人今楊慎謫戍永昌而毛玉滇人故書

永昌騰越大饑

四年秋八月鄉試雲貴生儒取趙鼎等五十五人

名第錄內雲南二十四人貴州二十一人成進士者楊傑高葑劉輔錢世賢皆雲南人

澂江羅藏溪有白氣上升如龍

冬十一月戶部尙書秦金請罷採雲南金寶不從

五年議開金沙江不成

野史金沙江古名麗水源出吐蕃界至共龍川犂牛

石下南流漸廣名犂牛又謂之犂牛河訛犂爲麗麗
水其陰犂州其陽也東經巨津寶山二州三面臨麗
江府而帶焉又東經鶴慶受漾共江諸水又東經北
勝受桑園龍潭程海諸水又東經姚安受蜻蛉弄棟
諸水又東經楚雄定遠受龍川江諸水又東經武定
受元謀西溪滇池螳螂諸水西入滴慮部受尋甸牛
闌谷壁諸水又東經烏蒙南又東經鹽井建昌會川
越嶲諸衛合瀘水受懷遠寧遠越溪雙橋長河瀘沽
大渡魚洞羅羅打冲東湖熱池諸水又東經馬湖府
受泥溪大汶小汶諸水又東至叙州府合大江而趨

荆吳焉此西南黑水之所從出蓋南中西北之險而
蒙僭稱之爲北瀆者也由滇之海口浮船武定金沙
達馬湖僅七日巡撫黃衷議開工役方興而爲武定
土舍鳳朝文所梗會衷又遷去事遂廢其後巡按毛
鳳韶巡撫汪文盛勘議復開而朝文妻瞿氏復從而
阻撓之隆慶初武定土酋誅滅巡撫陳用賓復爲題
請而議者多甲乙之辭大抵謂金沙之道一通則商
旅之往來競於舟而憚於陸其輓輸之貨當必衝斥
於北略而算緡之利告竭於程番之八府九驛之途
豈爲人言矣於是開江之議竟不能行

蛻按金沙一水合江漢朝宗固爲滇蜀血脉然謂通
道要津片帆可達吳楚此大不然金沙江自塞外來
通流無碍而滇水西行與合亦通流無碍然舟筏之
不由者一以廻遠二以險惡三以瘴毒四以無人烟
就使兵貴出奇此道迂而無用何況商賈賁持重寶
而肯由此不測之危途也哉且滇省所需之物由粵
楚而來者多則廣南巴黔中爲捷道又奚必逆溯而
上以求入於金沙乎竊謂議開金沙江者甚無謂也
野史歸咎於算縉言利之人從中陰阻殊不知江固
不塞何必言開即使果能縮遠爲近易險爲平吾恐

商賈亦終不願出於其途嗚呼籌邊者似不宜作無益害有益也

順寧新生村竹實光瑩如玉

霑益大水李樹結木瓜

迤西侵緬殺其宣慰莽紀歲

志孟養軍民宣慰司俗名迤西與蠻莫同襟金沙江
孟養居上流南至底馬撒疆連西洋北極吐蕃西通
天竺東南隣於緬山曰鬼窟號爲險要夷人據爲硬
寨小有瑕釁卽治兵相攻其地下濕夜寒濱江爲竹
樓以居元始通中華至元二十六年置雲遠路軍民